



TALOFA LAVA!

E mua'i sii le viiga ma le faafetai i le Atua, ona o lona alofa ma lona agalelei, ua tapuaaoina ai i le manuia le soifua o le Ekalesia Aoa. Ua lafo ai i fanua, taula o sã-folau o usugafono, ma talana'i utouto ai i Malua, aua le fono usu a le Ekalesia o lenei tausaga, 2023. Malo le folau!

I le ava tele, ou te faatalofa atu ai i le suafa manumalo o Iesu Keriso, i le au-faitau o le tatou Maluapapa. Faatalofa i le paia o le Ekalesia Aoa. Afio Lau Afioga i le Taitaifono ma le Faletua, faapea le Laulau o le Fonotele. Susu Susuga i Toeaina Faatonu ma Faletua; Susuga i Toeaina ma Faletua; Le nofo-a-Komiti o le Ekalesia; Susuga i Faafeagaiga ma Faletua, ma le mamalu o le Ekalesia.

Faatalofa i le Komiti o Malua, i Lau Afioga i le Taitaifono ma le Susuga i le Failautusi, ma Tamã o le Ekalesia.

E le saõ le tagi ma le faanoanoa, ona o mafutaga pelē ua vavaeina e le oti. Ua lē atoa tino o le tama, ua lē atoa foi tupe i fala, e pei o saafiafiga a le tausala, ona ua logo le va-teatea i le uiõ a le manu-sina ua ifo i malaga-loa, le faatamasoaliiiga a nisi o Tama ma Tina o le Ekalesia, faapea nisi o le mamalu o le Ekalesia. O le tatalo, ia alofa le Atua, ia faamafanafanaina pea le mamalu o le Ekalesia, ona o lana valaau paia i matua ma aiga e pele, i o tatou loto ma agaga.

O nai tala oototo o le malaga faa-le-aoaoga a Malua i lenei vaitau o le tausaga.

Na amataina polokalame faa-le-a'oa'oga a le Kolisi i lenei tausaga, i le Aso Lulu, 8 o Mati, 2023, i le Sauniga Lotu ma le Faamanatuga i le 7pm i le afaifi, na ta'ita'iina lava e le Komiti o Malua. O le Afioga i le Taitaifono o le Komiti le Susuga i le Toeaina ia Asotasi Gu Time, na ta'ita'ia le Sauniga Lotu ma le Faamanatuga. O le Susuga i le Toeaina ia Auvaa Peseta na faitauina le Tusi Paia. O talosaga na fofogaina e le Susuga i le Toeaina o Aila Patea. O le feau faa-le-agaga na tomatauina ai le Kolisi i le



Susuga Faifeau Fomai Faiaoga Vaitusi Nofoaiga (FS) Pule o le Kolisi

amataga o ana feau o lenei tausaga, na saunia e le Susuga i le Toeaina o Pouniu Faamausili. E momoli ai le agaga faafetai tele, i Tama o le Ekalesia, i tima'iga, faamalosiua, ma faamanuiaga, ta-osoina ai le folauga amata a le Kolisi i lenei tausaga. Na faaafio ai ma A'oa'o ma Faletua o le Tausaga Muamua i lea sauniga.

O le faaiuga o le tausaga 2022 i le masina o Tesema, na faataunuuna ai i le manuia, ia faauuga o nisi o faiaoga Malua, i le faailoga o le PhD. O le Susuga i le Faifeau ia Visesio Saga ma le Faletua, na faauuina i le 'University of Divinity' i Melepone Ausetalia; ma le Susuga i le Faifeau ia Fatilua Fatilua ma le Faletua, na faauuina i le 'Pacific Theological College' i Fiti. O i la'ua o faiaoga o le Feagaiga Fou. E viia ma saga faafetaia le alofa o le Atua, e ala i lana ekalesia, i le fesoasoani ma le lagolago, ua i'u manuia ai faamoemoe o faiaoga. Momoli ai le faamalo i Susuga i Faifeau, i le soifua tauivi mo le Atua, e ala i lana Ekalesia.

O le Fonotele o lenei tausaga, 2023, ua

faauuina ai Susuga i Faiaoga: Leuelu Setu ma le Faletua ia Panorama; Esera Esera ma le Faletua ia Pauline, e avea ma Faifeau Samoa. Ia faamanuia tele le Atua i lo outou soifua valaauina mo le Atua ma lana galuega.

O le tausaga ua tuana'i, 2022, na aloaia ai le faiga-paaga a Malua ma le Iunivesite o Otago i Niu Sila, i le fefaasoaa'i i so'o se ala, e pei o faletusi ma tomai faa-mataupu silisili o faiaoga, mo le faalauteleina o le tulaga a'oa'oina o fanau a le Ekalesia mo le galuega faa-faifeau. I le tausaga nei, ua maua ai se fesootaiga ma se faiga-paaga a le 'Princeton Theological Seminary (Princeton University)' i Amerika ma Malua. Ua mafai ona tatala mai e 'Princeton Theological Seminary' le latou 'online library,' e faaoga e Faiaoga ma A'oa'o Malua. Ua maua ai nisi alagãoa e faalautele ai su'esu'ega o loo feagai ma Faiaoga ma A'oa'o. E i ai le faamoemoe e faaauu lenei faiga paaga i le feasiaia'i o Faiaoga i le lumanai, aemaise o le maua ai o ni avanoa sikolasipi mo Malua.

I le agaga fiafia tele, e faailoa ai ma le agaga maulalo, le agaga faafetai i le Atua, ona o le amanaia ma le faaogaina o Susuga i Faiaoga Malua, e le faalapotopotoga o tagata su'esu'e o le Tusi Paia ma le Mataupu Silisili faa-va-o-malo (SBL - Society of Biblical Literature), e ta'ita'ia nisi o Komiti faapitoa o lea faalapotopotoga. E pei o le Susuga ia Brian Kolia ma le Susuga ia Fatilua Fatilua, ua filifilia i Komiti e faafoeina su'esu'ega i "Islands, Islanders and Scriptures" ma le "Humanimal Conference: The Bible and the "Other".

E faailoa foi mo le silafia, ua maea ona lolomiina le lomiga lua o le tusitusiga faa-va-o-malo a Malua e ta'ua o le *Samoa Journal of Theology*.

(Fa'auma i le itulau e 2...)

SILASILA I TOTONU

Talofa Lava! - Rev Dr Vaitusi Nofoaiga (FS)	1	OBSA / International Seminars	9
Saafiafiga Sui Taitaifono, Toeaina Faatonu Iosefa Uilelea	2	Meaalofa mo le Kolisi	10
Feilobaiga ma le Susuga ia John Wright / Harvard University	3	Vaaiga Eseese	11
Faauga a Faifeau Samoa	4	Ripoti Mafutaga / Taaloga a A'oa'o ma Faletua	12-13
Masters Program / Aoga Tusi Paia	5	A'oa'oga a le Fanau	14
Tusiga a Faiaoga ma A'oa'o (SJT)	6-7	Faamuli o le Eseta - Tausaga Muamua	15
Komiti Maluapapa	7	Mafutaga a le Kolisi / Motu o le pa ua iloa	16-17
Tusiga Faiaoga ma A'oa'o (Tafatolu)	8	Atina'e a le Kolisi	18
		Tautai a'e / Golf	19

UPU TOMUACONTD

Ua faailoa atu i totonu o le tatou Maluapapa nei, ia ni faamatalaga o tusitusiga ta'itasi o loo i ai. Fa'ataitaiga: "*O le Taimane e Vivi'i ai: A History of the Congregational Christian Church Samoa Apia Church,*" na tusia e Rev Dr Latu Latai ma Peone Fuimaono. O se talafaasolopito o le malumalu o le EFKS Apia, le *Taimane o le Vasa Laolao*, na fausia i le 1892.

E i ai foi se tasi o tusitusiga a Faiaoga Malua, e tusia i le gagana Samoa, e ta'ua o le Tafatolu, ua maea foi ona lolomiina, ma o loo faailoa atu tusitusiga o loo i ai, i totonu o le tatou Maluapapa. O le tasi lava o faamoemoe taua o nei tusitusiga, ina ia avea ma avanoa e faasoa ai nisi o suesuega faa-mataupu silisili e le gata i Faiaoga Malua, ae faapea foi nisi o le au-faigaluega faifeau ma tagata lotu.

O nisi ia o tala ootoo mai Malua i lenei vaitau. O le a faalautele atu e le tatou Maluapapa, faatasi ai ma nisi o feau ma galuega a le Kolisi, mo le silafia e le Ekalesia.

Ou te avea ai lenei avanoa e fai ma sui o le Kolisi, e momoli ai le agaga o le faafetai tele, i le Komiti o Malua; i Lau Afioga i le Taitaifono; faapea le Susuga i le Failautusi o le Komiti; ma sui mamalu o le Komiti o Malua; o Tamā o le Ekalesia. Faafetai i lo outou alofa faapalepale faa-Tamā, aemaise o le tofa faa-le-Atua, o loo ta'ita'iina ai pea i le manuia le faamoemoe o Malua, i lenei vaitau o le tausaga.

E momoli foi le agaga faafetai tele i le tapuaiga malu a le paia o le Ekalesia Faapotopotoga Kerisiano Samoa, i Samoa nei ma atunuu i fafo: Lau Afioga i le Taitaifono ma le Laulau-a-fono; Le mamalu o Tama o le Ekalesia, o Komiti eseese, o Matagaluega, o Pulega, ma Aulotu. Faafetai tele i la outou tatalo.

E le galo le tapuaiga a Matua ma Aiga. Faafetai tele i la outou tatalo, ma le fesoasoani mai i soo se ala. Ia manuia tele le fono usu a le Ekalesia i lenei tausaga.

Vaitusi Nofoaiga

PULE O LE KOLISI

SA'AFIAFIGA SUI TAITAIFONO TOEAINA FAATONU, IOSEFA UILELEA



O le masina o Tesema, 2022, na tuumalo ai le Susuga i le Toeaina Faatonu ia Iosefa Atapana Uilelela a o i ai i lana si'iga-gasegase i Niu Sila. E tū'ua le mālō o sē'e'i o ia i le tofi Sui Taitaifono o le Fonotele, 2022-2023, a o le Taitaifono faaolioli 2023-2024 e tusa ai ma faiga faavae a le Ekalesia EFKS. O le sui foi o le Komiti o Malua.

E tusa ai ma se pepa o faamatalaga i le upega tafa'ilagi a le EFKS o loo fa'amauiina ai na ulufale le Susuga i le Toeaina i Malua i le 1985 ma faai'uina le taumafai i le 1988. Na osi le feagaiga tu'uoti ma Lotofaga i le 1989, ma ua 33 tausaga o le la Galuega ma le Tinā Tekimatang i le Ekalesia. Na avea ma Faifeau Toeaina o le Pulega Lepā ma Lotofaga, ma Toeaina Fa'atonu o le Matāgaluega Lotofaga, Lepā ma Aleipata i le 2014. Na tofia e fai ma Failautusi o le Komiti Au Toeaina i le 2017. Na ulua'i filifilia i le Laulau o le Fono Tele i le 2019, se ia tōfia ma Taitaifono 2021-2022.

O le taunuu mai ai o le sa o le Susuga i le Sui Taitaifono mai Niu Sila na faia ai le sauniga faapitoa i le Fale Iupeli i Malua. Sa taitaia lava le sauniga ma le

Faamanatuga e le Susuga i le Taitaifono o le Fonotele le Susuga i le Toeaina ia Tunumoso Iosia, o le Susuga i le Faifeau Teuoloa ia Melepone Isara na feagai ma le faitauina o le Tusi Paia, a o le Susuga i le Failautusi le Susuga i le Faifeau ia Vavatau Taufao na saunoa i talosaga. Sa fa'atinoina foi le tula'i faaaloalo a le Kolisi ma tapenaina viiga o le Atua mo lea sauniga taua. Na mapu ane nisi o le Ekalesia na mafai ona auai i lea aso i le Maota Senetenari ma faia ai le taumafataga na saunia e le Kolisi Faafaifeau ma tauaalo aloaia ai foi ma le meaalofa a le Ekalesia Faapotopotoga Kerisiano Samoa mo le Faletua ma le nofoalo ma le Ekalesia i Lotofaga.

O ona toe sauniga sa faia lava i le malumalu tapua'i i Lotofaga. Sa taitaia e le Susuga i le Taitaifono o le Fonotele le Susuga i le Toeaina ia Tunumoso Iosia faatasi ai ma le lagolago a Susuga i Toeaina e fai ma sui o le Komiti o le Au Toeaina; o le Toeaina Faatonu ia Amuia Seuala sa feagai ma le faitauina o le Tusi Paia, o talosaga na saunoa i ai le Susuga i le Toeaina Faatonu ia Pouniu Faamausili. O le Susuga i le Toeaina Faatonu ia Leaso Tupa'i o le Failautusi foi o le Komiti o Tama o le Ekalesia na fai ma sui o le Komiti o le au Toeaina e faia le molimau. Sa auai ai foi taitai o le malo, i le Afioga i le Ao Mamalu o le Malo, Sui o le Fono Sui Tofia, faatasi ai ma le Tamaitai Palemia ma le taitai o le itu agai ma nisi o sui o le Palemene o Samoa.

O se avanoa taua foi e faaleoina ai le agaga faafetai tele mai le Susuga i le Alii Pule ia Rev. Dr. Vaitusi Nofoaiga ma le aiga Faiaoga ma Faletua ma le Kolisi i Malua, ona o le sao taua o lenei tama o le Ekalesia i le Kolisi ma ana fuafuaga a o tulai mai o se Failautusi o le Komiti o Malua, faapea foi ona tofiga i le laulau o le Fonotele. "Amuia e faanoanoa auā e faamafanafanaina i latou."

Tautai a'e Tamā, lau afioga i le Sui Taitaifono Fonotele - folau ia i lagimā!

FEILOA'IGA MA LE SUSUGA IA JOHN WRIGHT



Sa maua se avanoa e feiloa'i atu ai le Susuga i le Alii Pule o le Kolisi Faafaifeau i Malua, Rev. Dr Vaitusi Nofoaiga, i se tamalii mai Sikotilani e suafa ia John Wright, na malaga faapitoa mai lava e fia vaavaai ma molimau i le vaega tonu o Samoa sa galue ai si ona tua'ā (great great grandfather), le alii Faifeau ia William Harbutt. O le molimau a le Susuga ia Wright o se moemitiga ua leva ona momo'o i ai a o lea ua taunuu aua na ia faalogo lava i tala ma matamata i ata mai Samoa na teu lelei e ona matua a o lea faatoa vaai tino i ai.

E tusa ai ma le molimau a Wright, o si ona tua'ā ia Rev. William Harbutt poo Misi Alapati (o nisi faamaumauga o loo faaogaina ai le suafa Misi Hapati) na taunuu mai i Samoa i le tausaga e 1840 ae na tuua Samoa i le tausaga e 1858 ona ua gasegase. Sa galulue Misi Alapati ma lona Faletua ia Mary (Maria) ma nai o la alo e toaono i afioaga o A'ufaga, Lepa ma Lalomanu. E taofi Wright, o Misi Alapati ma lona Faletua na o la faatutūina lotu i totonu o afioaga nei. O Misi Alapati foi o se tasi o le auvaa na o latou faaliliuina nisi o tusi o le Feagaiga Tuai e pei o le tusi o Numera, Nofoaiga Tupu muamua, lea o loo faamauina i le tusi a le tama ia Kenape Faletose.

O le fiafiaga sili i le alii o Wright, ona sa maua foi le avanoa e asiasi ai i le maa faamanatu o loo tusia ai le suafa o Misi Alapati o loo i ai nei i A'ufaga. Na feiloa'i atu foi Wright i Susuga i faafeagaiga ia Rev. Dr Maliko Maliko i le afioaga o Lepa faapea foi le Susuga ia Rev. Dr Latu Latai o le afioaga o Apia ma maua mai ai nisi foi o faamaumauga e uiga i le galuega a Misi Alapati. E silia ma le 100 itulau o se suesuega na faatinoina e Wright agai i le soifuaga o Misi Alapati i le Pasefika, ae maise lava i Samoa, ua tuuina atu nei i le Faletusi o le Kolisi Faafaifeau mo ana faamaumauga ma o le a tele sona taua i sailiiliga faa-Talafaasolopito a A'oa'o ma Faiaoga faatasi ai ma Faletua.

HARVARD UNIVERSITY CURATOR

O le Aso Gafua 12 Tesema o le tausaga na se'i mavae atu nei, sa feiloai atu ai nisi o faiaoga o le Kolisi i Malua, ma se tamaitai fomai Professor Ingrid Ahlgren mai le Iunivesitē ta'uta'ua i lunaite Setete o Amerika, o *Harvard University*. O le Falemata'aga ua ta'ua o le *Peabody Museum of Archaeology and Ethnology, Harvard University*, lea o loo tausia ma vaavaaia (*curator*) e lenei tamaitai fomai. O le faamoemoe o lea feiloaiga, ona o loo ia asiasi mai i Samoa e tau faamautū le faafoi mai i Samoa o measina ma galuega taulima mai anamua (*artifacts*) ua sili atu ma le selau tausaga o loo teuina i lo latou Iunivesitē. E sili atu ma le lua miliona o ata, galuega taulima mai anamua, ma measina o loo latou teuina e maua mai le Pasefika, ma o loo tele foi le vaega mai Samoa lava ia. Sa tau saili se avanoa e feiloai atu ai Professor Ingrid ma le aufaigaluega a le Falemata'aga o Samoa, pe'ita'i, sa naunau lava ina ia maua foi ma se feiloaiga ma sui o le Kolisi i Malua aemaise ni sui o le Ekalesia EFKS. Ua latou manatu o loo telē se tala faasolopito o le Ekalesia e mafai ona faamatalaina ma faamaonia, mai le anoanoa'i o galuega taulima mai anamua ma measina o le atunuu o loo latou tausia ma leoleoina. A'o lea ua finagalo le aufaigaluega a le Falemata'aga a le Iunivesitē Harvard, ua talafeagai le toe faafoi mai ia tatou o nisi o vaega tāua ia o le tala faasolopito o Samoa ma le Ekalesia. O le Susuga i le Sui Pule ia Makesi Neemia, ma Faiaoga ia Arthur Wulf ma Alesana Pala'amo, faatasi ma le Faletua o le A'oa'o i'u mai Malua ia Susana Liufau, sa auai atu i lea faatasiga.

Ina ua mae'a ona faailoa mai o ana ata i le tele o vaega eseese o loo latou uumia, sa maua ai ma lona avanoa e molimauina faamaumauga a le FGFL (Faalapotopotoga o Galuega Faamisionare o le Lalolagi) poo le Council for World Mission CWM Archives (microfiche) o loo teuina i le tatou faletusi i Malua. E lē gata i lea, ae sa ia molimauina foi Sulu Samoa mai le tausaga 1839, o loo teuina i le faletusi i Malua faatasi ma lana upega tafa'ilagi. Saunua le tamaitai fomai, o loo saogalemu lelei lava ma talafeagai le teuina e le Kolisi o ana faamaumauga tāua nei mo le Ekalesia. Sa maua foi le avanoa e asia le Fale Iupeli e matamata ai le tamaitai fomai i tioata o le Fale Iupeli, ae faamatala e le Faletua o Susana le uiga o tioata e pei ona sa tapenaina e le Susuga ia Pelenato Liufau ma le Aoga Tusiata o le EFKS. Ona faai'u lea o le asiasiga agai le Falemata'aga o le EFKS, ma molimauina e le tamaitai fomai galuega taulima ma ata eseese o loo i ai.

O lea ua amata nei se tatou fesootaiga lelei ma le Iunivesitē o Harvard aemaise lo latou Falemata'aga le *Peabody Museum*. Ma o le naunautai o le tamaitai fomai Professor Ingrid, ina ia faia se faigapaaga ma latou i se taimi o le lumanai. Atonu o se fesootaiga mafanafana lea, o le ā mafai ai ona toe faafoi mai i lafanua o Samoa nisi o ana measina faapea ma ana galuega taulima mai anamua, ua sili atu ma le selau tausaga o tausia i atunuu mamao. E pei ona molimauina e lē o loo ia taitaia le Falemata'aga *Peabody Museum* a le Iunivesite o Harvard, o loo tausia lelei e le Kolisi i Malua ana faamaumauga tāua i le taimi nei. Afai lā o le ā faamatu'u mai vaega eseese e pei ona asia ai le Kolisi, ua talafeagai lelei lava ma le fausia o se Faletusi fou a le Kolisi i Malua e pei ona i ai se faamoemoe i le taimi nei. O le tāua o se Faletusi fou mo le Kolisi i Malua, auā le malu puipua o measina a Samoa faapea faamaumauga tāua mo le Ekalesia, mo le asō, aemaise mo augatupulaga i le lumanai.



FAAUUGA FAIAOGA

O le Aso Faraile, 3 Tesema 2022, na faataunuuna ai le faamoemoe o le Susuga i le Faifeau Faiaoga ia Visesio Saga o le faauuga i le faailoga o le PhD, i le laumua o Adelaide, Ausetalia. Sa auai faatasi atu ai ma le Faletua ia Angharad ma le fanau, o aiga ma nisi o Faafeagaiga mai Melepone ma Purisipeni Ausetalia mo lea faamoemoe taua. O le tusiga a le Susuga ia Saga mo le faailoga o le PhD ua faaulutalaina o le: ““Other boats were with him” (Mk 4:36). The radical inclusivity of the Samoan *motu o tagata* reading of Mark.” O lenei tusiga sa faatinoina i lalo o le taitaiga a Susuga i Faiaoga o; Associate Professor Keith Dyer ma Professor Mark Brett. O le Kolisi a Whitley, o se tasi o aoga i totonu o le University of Divinity, Melbourne, Australia.

O loo galue nei le Susuga ia Saga i le Matagaluega o le Feagaiga Fou i le Kolisi Faafaifeau. E faaleoina le agaga faafetai o le Faiaoga i le Kolisi i Malua, le Komiti o Malua ma le Ekalesia Aoa, a o Ekalesia foi i Samoa ma Ausetalia sa fesoasoani malosi i lo latou taumafai. Ia faamanuia le Atua.



FAIFEAU FAAUU

O le Aso Toonai 20 o Me, 2023 na faataunuuna ai le sauniga lotu faapitoa i le malumalu “O Le Fale Iupeli”, e faauuina ai Faifeau Samoa ma Faletua e to’asefulu ma le to’afa (14). O i latou ua agavaa mo le tautuaina o le Upu ma le Sakarameta a le Atua e ala i le tofiga Faifeau Samoa (FS). O lenei faamoemoe sa faauuina ai nisi o Faiaoga Malua. O le Susuga ia Esera Esera ma le Faletua ia Pauline, faapea le Susuga ia Leuelu Setu ma le Faletua ia Panorama. Na taitaiina lea sauniga e le Susuga i le Toeaina Faatonu ia Makerusa Porotesano mai le Matagaluega o Amerika; faitauina le Tusi Paia e le Susuga i le Toeaina Faatonu ia Tinetali Gafa; o le tatalo e faapaia ai tofi na saunia e le Susuga i le Toeaina Faatonu ia Pouniu Faamausili; ma le Susuga i le Toeaina Faatonu ia Leaso Tupa’i na fofogaina Suafa o Faifeau ma Faletua faau’u.

O Susuga i Toeaiina ia Makerusa Porotesano FT, Asotasi Gu Time FT, Simeona Taefu FT, Aviti Etuale FT, Faatulituli Setu FT, ma Tunumoso Iosia FT na fai ma sui o le Komiti o Tamā o le Ekalesia, e faaee o latou aao i luga o Faifeau faauu.

Sa vaai le sagisagi fiafia mai o aiga ma aulotu, e tapuaia ma lagolagosua i lea faamoemoe taua a le Ekalesia. Auā o se faamoemoe o loo tulimata’i uma e A’oa’o ma Faletua o loo iu mai le laumua ina ia ausia. O le Susuga ia Esera Esera o loo galue i totonu o le Kolisi Faafaifeau i le Matagaluega o le Mataupu Silisili. O le Susuga i le Faiaoga ia Leuelu Setu o loo galue i le Matagaluega o le Talafaasolopito o le Ekalesia. O moomooga ma alofaaga o le Susuga i le Alii Pule ma le Kolisi, ina ia manuia le tulai mai o Susuga i Faifeau Faiaoga ma Faletua ma aiga i lea laasaga taua o le soifua tautua i le Atua ma Lana Ekalesia, e ala i le valaauina i totonu ole Kolisi Faafaifeau.



MASTERS PROGRAM

E mua lava le viiga i le Atua potopoto aua o lona mana ma lana taitaiga o loo gasolo lelei ai galuega fai a le polokalame o le Master of Theology i lana Kolisi Faafaifeau i Malua. O le tausaga lona lua leni o le polokalame.

E lua vaega o loo vaevaeina i ai. O le vaega muamua o loo faagasolo a latou susesuega ma tusiga (Thesis) ma le faamoemoe e faauuina i le faaiuga o le tausaga nei. E tovalu i latou ia e aofia ai sikolasipi e toatolu a le Ekalesia, tasi le sikolasipi mai le Kolisi Faafaifeau i Kanana Fou, o A'oa'o iu mai Malua e toatolu o loo galulue i Matagaluega a le Ekalesia, o le Faifeau o loo galue i se tasi o Matagaluega a le Ekalesia ma le Faifeau o loo galue i se tasi o Matagaluega a le Malo. O le vaega lona lua, e toatolu sui o aotauina ai, o i latou nei o loo umia faailoga taualoa o le BTh ma o loo faagasolo a latou mataupu e tapena ai mo ā latou tusiga i le tausaga fou. I lona aotelega, e 11 Faifeau ma A'oa'o i'u mai Malua ma le A'oa'o i'u mai le Kolisi Faafaifeau i Kanana Fou o loo i ai i le polokalame i leni tausaga.

O le faauuga a le Kolisi Faafaifeau i Malua i le tausaga na tuana'i atu nei, e toafitu sui o le polokalame o le Master na faauuina ai. Na mataituina le maualuga o togi na o latou ausia, aemaise lava o togi mai i ai latou na iloiloina tusiga i fafo atu o Samoa (external makers).

E avega ai leni avanoa e fai ai lo'u faatauvaavaa ma fofoga taumomoli o le Susuga i le Alii Pule, Sui Pule ma le Aiga Faiaoga, aemaise le Kolisi Faafaifeau i Malua, e momoli atu ai la matou faafetai tele mai le taele o matou agaga i le tapuaiga ma le lagolago a le Paia ma le Mamalu o le Ekalesia Aoao i ona tulaga faalupe; Susu o Susuga i Tama o le Ekalesia ma o outou Faletua, le Paia o le Au Faigaluega ma Faletua, ae tainane le loaloa o le Ekalesia i Samoa nei ma atunuu e mamao.

Soifua ma ia Manuia

AOGA TUSI PAIA

E mua lava ona faafeiloai atu ma ofo alofa atu i le Suafa manumalo o lo tatou Alii o Iesu Keriso i le mamalu o le Ekalesia Aoao ua potopoto mai mo lana Fonotele 2023.

O le aso 13 o le masina o Fepuari sa toe amatalia ai polokalame a le Aoga Tusi Paia e pei ona masani ai i tausaga taitasi. O le taimi nei e lua lālā o le Aoga Tusi Paia a Malua o loo faatinoina ai vasega. O Samoa (Apia ma Salelologa, Savaii) ma Aukilani (Niu Sila). O loo gasolo lelei lava a'oa'oga ma vasega i lālā nei e lua. O vasega i Apia ma Salelologa, o loo molimauina le sologa lelei lava. O loo faatupulaia lava le fuainumera o sui aoga sei vagana ai le polokalame o le Tipiloma i Salelologa. E mafua ona o le toatele o i latou ua faauu i le polokalame o le Tusi Pasi ua le toe faaauuina lo latou taumafai. O loo lelei foi le gasologa o a'oa'oga ma polokalame i Aukilani Niusila, i lona lua leni o tausaga talu ona amatalia. O le taimi nei o loo tofia le tumau vasega i le lālā o le Aoga Tusi Paia a Malua i Sini Ausetalia, sei i ai se taimi. I se aotelega, o loo sologa manuia lava le Aoga Tusi Paia.

O le Aso 18 o Mati sa faataunuuna ai le Faauuga lona 11, talu ona faavaeina le Aoga Tusi Paia i le 2007. E 23 i latou sa faauu i le Tusi Pasi i A'oa'oga Faale-Mataupu Silisili, ma le 24 sa faamanuiaina i le Tipiloma i A'oa'oga faale-mataupu silisili. E faaopoopo ai ma le toalua na faauu i faailoga uma e lua. E 24 tamaitai sa faauuina i le faauuga. E toatasi i le faailoga o le Tusi Pasi, toa luasefulu lua mo le faailoga Tipiloma ma le toatasi na faauu i faailoga uma e lua. O le toatele o tamaitai na faauu i le Tipiloma, o Faletua o A'oa'o Malua na faauu i le 2022. O Faletua nei na faapena ona faagasolo a latou vasega i le fa tausaga na aumau ma aotauina ai i Malua. Sa faauuina ai foi ma sui mai Ekalesia eseese e i ai le Metotisi, Worship Centre, Assembly of God, Penetekoso ma le Katoliko Roma. O le Susuga i le Taitaifono o le Komiti o Malua, le Susuga i le Toeaina ia Asotasi Gu Time sa ia taitaiina le sauniga i lea aso. Mo ē uma sa faauuina i leni tausaga, ua faamalo le taupati, malo le tauivi.

E avega ai leni avanoa e fai ai lou leo faatauvaavaa e fai ma fofoga o le Aoga Tusi Paia e faaleoina ai le faafetai tele a le Susuga i le Alii Pule ma Faiaoga i le lagolago malosi ma le tapuaiga tatalo a Susuga i Toeaina ma Faletua, Faafeagaiga ma Faletua, faapea le paia ma le mamalu o le Ekalesia, o loo manuia ai le faamoemoe o le Aoga Tusi Paia. Ia faamanuia tele le Atua.

E faapitoa lava se faafetai i le Matagaluega a Faasaleleaga, Susuga i Toeaina ma Faletua, Faafeagaiga ma Faletua, faapea le paia o le Matagaluega i ona tulaga faalupe, ona o le lagolago, fesoasoani, ma le tausaiaina o le afaigaluega faiaoga o loo autovaa atu i Kuata taitasi mo le faatinoga o vasega. Ia faamanuia tele le Atua i lo outou alofa tausai.

Ia manuia tele le feagai ai o le Ekalesia ma lana Fonotele i le alofa o le Atua.




TUSIGA FAIAOGA MA A'OA'O

Tusiga ma faamatalaga mo le *Samoa Journal of Theology*

Ua maea ona faatulaga ma faamaopoopo tusiga mo le Volume II o la tatou *Samoa Journal of Theology (SJT)*. E pei ona amata i le tausaga ua tuanai (2022), o le faamoemoe lava o se tusitusiga faa-va-o-malo tuufaasolo a Faiaoga Malua ma le Ekalesia i suesuega faa-le-Tusi Paia, faa-le-Mataupu Silisili, Talafaasolopito o le Ekalesia, ma le Galuega Faafaifeau. Ua faia foi lea fuafuaga ina ia o gatasi ma le faamoemoe o le polokalame o le Master of Theology e pei ona faaauau ai nei i Malua.

Mo le Volume II, e 12 tusiga mai matagaluega eseese ua maea ona faamaopoopoina ma ua maea foi ona iloiloaina e sui o le Laulau a Faatonu (Editorial Board) a le *Samoa Journal of Theology*. O nei tusiga e matafelefele ona autu ma e atagia ai nisi o mataupu o loo finauina ma faatalanoaina, e le gata o totonu o lo tatou lava lotoifale i Samoa nei, a o sailiiliga foi a le au suesue i fafo atu o si o tatou atunuu.

Silasila ane, o tusiga ma nai faamatalaga pupu'u faa-Peretania mo le silafia:



O le Taimane e Vivi'i ai: A History of the Congregational Christian Church Samoa Apia Church

Peone Fuimaono & Latu Latai

This article tells the story of the Taimane o le Vasa Laolao church, the oldest surviving building in Apia. The authors argue that preserving such historical buildings plays a significant role in perpetuating stories of faith from our past ancestors.



From *Faleoo* to the Christian Missionaries' Formal Education Approach

Clarke Tusani Stowers

Using a faleoo perspective, the author explores the significance of educational learning and teaching in our Samoan world, starting from the Samoan indigenous way of learning and teaching to the formal education brought in by the missionaries and later utilized by the Christian missionaries as a basic instructional approach.



Diagnosing Jeremiah's Incurable Diseases from a Samoan *Taulasea* Perspective

Arthur J. Wulf

This biblical studies paper interweaves Jeremiah 15: 15–18 within the premises of a Samoan taulasea perspective. It follows a dialogical approach to the text, leading to a taulasea diagnostic description of the prophet Jeremiah's incurable ailment.



Understanding Healing in Exodus 15: 22–27 through the arts of Samoan *fofō* and *fōfō*

Samasoni Moleli

This analysis of Exodus 15:22-27 approaches the text through two distinct lenses: that of Samoan fofō-temporary massaging of an ailment or injury; and the process of fōfō - an ongoing practice of massaging for healing and restoration. The resulting approach employs both arts of fofō and fōfō to unearth literary ambiguities in the text.



The *I'a Tele* (Great Fish) and the Search for Jonah: A *Fāgogo* Reading of Jonah 1:17–2:10

Brian Kolia

This re-reading of Jonah 1:17-2:10 using fāgogo hermeneutic interweaves the Maa o le Tanifa story with the Jonah narrative in a way that highlights the agency of the i'a tele in its search for Jonah.



Suffering in Discipleship: A Sociorhetorical Reading of 1 Peter 4:1–19

Vaitusi Nofoaiga

Employing sociorhetorical interpretive analytic, the author engages 1 Peter 4:1-19 to explore whether the function and role of Peter, as one of the Church Elders, helped the development of the Early Church. The purpose is to seek in the first letter of Peter biblical and theological meanings of suffering in serving God as a disciple or servant of Jesus.



The Markan “ochlos”: we are all radically included!

Visessio Saga

This article explores a radically inclusive understanding of the crowds and other characters in Mark’s Gospel from a Samoan perspective. This radical inclusivity is qualified only when some temporarily exclude themselves due to the varying degrees of their expressed or implied opposition to Jesus and when all others in the Gospel of Mark fail to follow truly.



Fili i le tai se agavaa (wisdom is revealed at sea): re-situating John 6:16-21 on the tai-side

Fatilua Fatilua

Drawing upon the Samoan proverb, fili i le tai se agavaa, the author argues that the sea plays a meditating role in shaping and molding the disciples in their faith journey in John 6:16-21.



Exploring Discipleship in Matthew 28:16-20 using the Open System Interconnection (OSI) Model

Hobert Sasa

This article explores Matt. 28:16-20 in order to make sense of how discipleship is to be perceived and healed in our modern world of technology.



Heaven and Earth Inseparable: A Samoan Eco-Theological Perspective

Taipisia Leilua

This article argues for a more holistic approach to counter the dualistic view that is often expressed in the phrase “e le o so tatou nuu moni lenei”(this is not our real or true home). Emphasizing the inseparability of heaven and earth, the aim is for a fuller understanding of God’s salvation that is inclusive of all things in creation.



What does Christian Theology have to do with the Economy? A Theological Critique of the Economy from a Samoan understanding of Tamaoaiga

Esera Jr Esera

This theological paper argues from a Christian and a Samoan perspective that the economy as a discipline should be understood within a narrative that is inclusive of the life-giving values of a community.



A Comparison of Samoan Proverbs and Sayings of Jesus from the Matthean gospel: A Sociorhetorical Perspective

Faafetai Koria

Using sociorhetorical criticism, the author explores parallels between the Scripture and Samoan proverbs to advance the Gospel in Samoan interaction and dialogue settings today. The aim is for a standardized approach to understanding these parallels.


KOMITI MALUAPAPA



TUSIGA FAIAOGA MA A'OA'O

Tusiga ma faamatalaga pupu'u mo le lomiga o le Tafatolu, 2023.

E pei ona masani mai ai i tausaga ua mavae, o tusiga nei ma ni faamatalaga pupu'u o le a mafai ona mauaina i le lomiga o le Tafatolu mo le Fonotele, 2023. O nei tusiga sa muamua ona fofogaina ai le au faigaluega i le Mafutaga Faafouina Faifeau, 2022, ma ua tuufaatasia mo le lomiga o le Tafatolu 2023.

**1. Tumau le Alofa o le Tasi i le Isi: 1 Peteru 4:8-10**

Tusia e Samasoni Moleli

O le faaaogaina o gagana o tusiga e faafesootai ai le 1 Peteru 4:8-10 ma nisi o Tulafono i le Feagaiga Tuai. O le faamoemoe e faatupu manatu i le faatofala'iga a le Ekalesia i lenei vaiata o le tuana'i o le koviti (post-covid times).

**2. Moana ma Koheleta: O mea e faatauavaa i le Tiasipora?**

Tusia e Brian Fiu Kolia

O se suesuega o le upu *Moana* ma lona faauigaina i le vaai faa-Pasefika. O le faamoemoe ina ia fausiaina ai se faitauga o tusiga a le Poto aemaise o le t'aua o le nofoaga o mea i totonu o le foafoaga a le Atua.

**3. Feteena'iga i totonu o Tusi: "Ua fai mai lenei nuu, E le i oo i ona aso, O aso e fai ai le fale o le Alii"**

Tusia e Malutafa Faalili

E toe asia e le tusiga nisi o feteena'iga o manatu/mafauauga o loo molimauina i totonu o le tusi o Hakai, aemaise o le fuaitau ua ta'ua i le ulutala o lenei pepa. O le faamoemoe, o se faatupu manatu i le fe'au ma le galuega ua valaauina i ai le Ekalesia faapea tagata uma.

**4. Faat'auaina o le gagana faafitifiti i le faauigaga o le Mataio 15:21-28.**

Tusia e Fatilua Fatilua

E faata'i ai le faaaogaina o le vaogagana faafitifiti e faitau ai le Mataio 15:21-28 le tala i le feiloaiga a Iesu ma le fafine Kanana. O le faamoemoe ina ia faatau la tatou gagana Samoa i suesuega o le Tusi Paia.

**5. "Motu o tagata": Faalauteleina ma le ma'ale'ale o le ola mulimuli ia Iesu.**

Tusia e Visesio Saga

O se faamatalalaina o le upu Eleni *ὄχλος/ὄχλοι* (*crowd/s*), e faaoga i ai le faaliliuga fa'aSamoa, 'motu o tagata'. O le faamoemoe, ia laugatasia tagata uma o mulimuli ia Iesu i totonu o le li'o o le 'motu o tagata'.

**6. Mata'upu silisili ia Iesu Keriso ma le Fanua (Christology and Land).**

Tusia e Esera Jr Esera

O lenei tusiga na te faatauaina ai le faasaoina ma le vaaia lelei o le siosiomaga. O se tasi o faamoemoe ina ia faatalanoaina ai mataupu o fanua tau Samoa ma lona faaaogaina e tatau ai.

**7. Fofoaga Faaauau: O le Atua ma Pā'ō o le Ola [Pro-Creativity: God and the Rhythm of Life.]**

Tusia e Olive Samuelu

O se sailiga o finagalo i le tatau ma le le tatau ona faaaauau pea o su'esu'ega faa-saienisi e mafai ai e le au atamamai ona maua ni fofo o le tele o faama'i o loo tau ponatia ai 'pā'ō o le ola'. O le faamoemoe o se faatupu manatu i le tele o faafitauli o loo feagai ai i lenei vaiata.

**8. Lasalo: Tatala mai le Saisaitia i le Oti [Lazarus: Release from being bound by death]**

Tusia e Alesana F. Palaamo

O le tusiga e faafesootai ai le Ioane 11:38-44 ma le lagona e moomia e le Ekalesia ona toe silasila totoa i lana galuega tatala ma tuuina atu o ē o saisaitia i avega mamafa o loo mafatia ma nofo pologa ai le toatele o tagata.

**9. 'Aiga o le Atua' ma le Galuega Faafaife'au Mo Tupulaga Talavou (Youth Ministry).**

Tusia e Karā Ipiniu

O le tusiga e toe auiliiliina ai le uiga o le *talavou* ma le galuega faafaife'au mo tupulaga talavou. O se faatupu manatu mo tiute faaleagaga e limata'ita'iina ai tupulaga talavou o loo i le laasaga o le suia mai le tamaititi aga'i atu i le fai ma tagata matua.

**10. O Mamanu: E faatauavaa i le vaai a le tagata, ae lē faatauavaa i le Atua.**

Tusia e Clarke Stowers

O se saililiga e tau faamanino ai le sao tele o tagata misionare mai le vasa Pasefika faatasi ai ma le tali atu o tagata Samoa, i le tupu ma le a'oa'oina lelei o le Talalelei. O le faamoemoe ina ia fai ma lu'i i le faatinoina o le galuega a le Atua ae maise o augatupulaga o le lumanai.

**11. Se faafitauli le 'tele o lotu' po o se tali lelei i le galuega So'ofaatasi a Ekalesa?**

Tusia e Leuelu Setu

O le tusiga e faatatau i galuega soo faatasi o Ekalesia Kerisiano i Samoa. O le faamoemoe ina ia faaaogaina le upu "putuputu a ululau" e faamatalalata ai uiga taua ma lelei o galuega soo faatasi. Ia manuia tele lau faitau i lenei tausaga.

OBSA



OBSA Kanana Fou, Amerika Samoa 2023.

O le aso 5-7 Aperila 2023, na malaga ai nisi o Faiaoga, ma A'oa'o o le polokalame o le Masters mo le fonotaga a le OBSA (Oceania Biblical Studies Association) na faia i le Kolisi Faafaifeau i Kanana Fou, i Tafuna Amerika Samoa. O le fonotaga muamua lea o fonotaga e lua o lenei tausaga, e faia i le tatou Kolisi i Malua nei le fonotaga lona lua i le aso 30 o Aukuso i le aso 1 o Setema, o le tausaga nei lava.

O le sini autu la o le fonotaga na faia i Kanana Fou, o le "Bible, Crises, Healing." ("O le Tusi Paia, o Faalavelave Ogaoga, ma Faamalologa.") Sa molimauina lava le matagofie o lenei fonotaga, ona o nisi o faasoā tāua ma suesuega i le Tusi Paia, a nisi o tagata su'esu'e iloga o le lalolagi e pei o Jione Havea ma Monica Melancthon, ma se faasoā foi a tatou foi Faiaoga ma A'oa'o o le polokalame a le Masters. Ae le gata i lea, na mafai ona auai atu nisi o Tamā o le Ekalesia EFKAS faapea le au faigaluega, e faasoā atu ai o latou silafia faafaifeau tausinuu, ma ua maua lava le faamoemoe o le OBSA.

O pepa nei sa tuuina atu e Faiaoga ma A'oa'o Malua:

Arthur Wulf, **"Diagnosing Jeremiah and Paul's Incurable Diseases from a Samoan Taulasea Perspective."**

Samasoni A Moleli, **"Understanding Healing in Exodus 15:22-26 through the arts of Samoan *fofō* and *fōfō*."**

Olive Samuelu, **"Vaosa: The Healing of Tuifiti and the Naaman Narrative (2 Kings 5:1-19)."**

Brian Kolia, **"De-silencing Naaman?: A Riverine Reading of 2 Kings 5"**

Fatilua Fatilua, **"Surveying the use of *ἰάουαι* in Luke: A connection between healing and community?"**

Esera Esera, **"O Laloifi lenei: A Samoan Lotoifale (household) understanding of Healing."**

Robert Sasa, **"Exploring Discipleship in Matthew 28:16-20 using the Open System Interconnection (OSI) Model"**

Faafetai Korā, **"A Comparison of Samoan Proverbs and Sayings of Jesus from the Matthean gospel: A Socio-Rhetorical Perspective"**

E faafetaia ai le tapuaiga a Tama o le Ekalesia, faapea le Ekalesia Aoao, ma le tatou Kolisi i Malua, ua iu manuia ai faiva sa feagai ma faiaoga ma A'oa'o i lenei faamoemoe taua.



INTERNATIONAL SEMINARS

Sa auai foi nisi o Faiaoga i fonotaga faava-o-malo o lenei tausaga. Sa faia le fonotaga i luga o le zoom, ma ua ta'ua lenei fonotaga o le "Humanimal Virtual Conference" i le aso 9-10 o Mati (taimi Amerika). O lea fonotaga sa iloilo ai le tāua o manu i totonu o le Tusi Paia, faapea nisi o faitauga mai le vaaiga a manu (animal hermeneutics). Na faia ai le pepa a le Susuga i le Faiaoga ia Brian Kolia, "The *I'a Tele* (Great Fish) and the Search for Jonah: A *Fāgogo* Reading of Jonah 1:17-2:10."

O le masina o Iuni e faia ai le fonotaga a le ANZATS (Australian and New Zealand Association of Theological Schools) i luga o le zoom, mai le aso 3-5 o Iulai 2023. O le sini autu o lea fonotaga o le "Context and Tradition." O le a saunia ai le pepa a le Susuga ia Kara Siasia ua faaigoaina, "*O a'oga a mea uma!*": A Samoan Educational Approach to weave Sexuality Education to the Christian Pedagogy of the Congregational Christian Church Samoa." E faapea foi le Susuga ia Brian Kolia ma le pepa ua faaulutalaina "Auē le Mea Uli!: Racism from the Moana?"



O le masina o Iulai, o le a auai atu foi nisi o faiaoga mo fonotaga e faia i Aferika i Saute. O le Susuga ia Alesana Palaamo o le a auai atu i le fonotaga o le ICPCC (International Council Pastoral Care and Counselling) i le aso 2-7 o Iulai 2023. O le sini autu o lea fonotaga: "Pastoral caregiving within processes of radical socio-political transformation, change and conflict." O lana pepa e faaigoaina o le "Navigating Pastoral caregiving that Aligns with the Evolution of a Changing Samoan self."



O le Susuga ia Fatilua Fatilua o le a fai ma sui o le Kolisi i le Fonotaga o le ISBL (International Meeting for the Society of Biblical Literature) e faia foi i Aferika i Saute, i le aso 3-7 Iulai 2023. O lana pepa e faaulutalaina: "Reading the Canaanite Woman from the Perspective of Samoan Political Discourse: Determining Who Gets What, Where, and How."



O le faaiuga o le masina lava lea o Iulai, aso 20-26, o le a malaga atu foi le Susuga ia Kolia, e fai ma sui o le Kolisi i le Fonotaga o le International Congregational Fellowship, e faia i Fiti, ma o le a ia faia le saunoaga autu o lea fonotaga.

E momoli atu le faafetai tele i le Komiti o Tama o le Ekalesia, faapea Malua ma le Ekalesia Aoao ona o le lagolagoina ma le tapuaiga o fonotaga o feagai ma nei auuuna.

MEALOFA MO LE KOLISI

TAUAAOINA MAI E LE FONO FAAVAE A LE ITUMALO SAGAGA 4, NI OLOA MO LE ATINA'EINA O FA'ATOAGA MA LAFUMANU, MA LE \$2000 MO MALUA



O le polokalame faasolo a le malo mo le atina'e o itumalo, e ala i le faasafua mai e Fono Faavae a itumalo ta'itasi o mea faigaluega ma seleni mo nuu, na o'o mai ai le faasoa a le Fono Faavae a le itumalo Sagaga 4 ia Malua. Na tauaaoina mai ni moavao seeloi, o uili paelo, o le ili laau, o agaese, ma le tupe e \$2000. E mautinoa le aoga tele o oloa ua tuuina mai, ma le seleni, mo atina'e o faatoaga ma lafumanu o loo faia a Malua, faapea foi le faamamaina o le matou aai.



E avea ai leni avanoa e momoli ai le faafetai tele i le Afioga i le Alii Faipule o Tagaloatele Pasi Poloia ma le Fono Faavae a le itumalo o Sagaga 4, mo oloa ma le tupe ua faasoa mai mo Malua. O le faafetai lava lea i le faigamalo mo polokalame fuafuaina, mo le atina'eina o nuu ma itumalo o loo faagasolo i le taimi nei. Ia faamanuia tele le Atua i fuafuaga lelei uma ua faataoto ma faatino, mo le manuia lautele o Samoa ma ona tagata.

FOA'I MAI E LE MATAGALUEGA A KUINISELANI I SAUTE AUSETALIA LE PIANO MA LE SPEAKER MO MALUA



O le lotu talosaga a Tama o le Ekalesia na faia i le Aso Gafua, 15 o Me i le 7.00 i le afiafi, e amata ai faigalotu o le fono usu a le Ekalesia o leni tausaga, 2023, ma talosia ai ona tualumaga uma, sa taitai'a e le Susuga i le Toeaina Faatonu ia Tauaaga Mataafa mai le Matagaluega a Kuiniselani i Saute, Ausetalia. O se sauniga na molimauina le matagofie o tapenaga uma, aemaise o le feau faamalosiua a le Susuga i le Toeaina, e faataua ai pea le galuega lavea'i ma le faamalolo a le Ekalesia. Na matauina le masii mai o le Matagaluega a Kuiniselani i Saute, e lagolago ma faataua le avanoa ua maua e lo latou Tama Faatonu, e ta'ita'ia ai se sauniga lotu o le Fonotele i Malua. I le maea ai o leni sauniga, na faailoa ai e le Susuga i le Toeaina Faatonu ia Tauaaga i se vaega o lana saunoaga mulimuli, le foaiina mai e le Matagaluega a Kuiniselani i Saute o le piano fou faatasi ai ma mea uma na faaogaina e pei o le speaker, i le faigalotu lea, mo le Kolisi i Malua. O se meaalofo taua tele leni meaalofo mo le Kolisi. E le gata e aoga i totonu o le Kolisi i le taina o pese o nisi o tapuaiga ma faigalotu, ae faapea foi galuega faamasani a le tausaga tolu. E momoli ai la matou faafetai tele, i le agalelei foa'i o le Susuga i le Toeaina Faatonu ma le Faletua, Susuga i le Toeaina ma le Faletua, Susuga i Faafeagaiga ma Faletua, ma le mamalu o le Matagaluega i ona tulaga faalupe. Ia faamanuia tele le Atua i lo outou alofa, ma lo outou agalelei mo Malua.

MEALOFA MAI LE LIONS CLUB, SUNSHINE VICTORIA AUSTRALIA

O le Aso Lulu, 22 Fepuari 2023, na malaga mai ai le Susuga i le Faafeagaiga ia Samani Sila (EFKS Brimbank) ma sui o le Lions Club, Sunshine Victoria, e momoli aloaia mai meaalofo mo le Kolisi ma lana Aoga Amata. O le Lions (Rotary) Club, o se faalapotopotoga o loo faatinoina auunaga mo tagata, o aoga, ma sosaiete eseese o le lalolagi, ae maise mo i latou o loo utiuti le faasoa ma i ai ni manaoga faapitoa. O nisi o meaalofo sa tauaao i ai le Lions Club, e aofia ai meataalo mo le fanau, o api ma tusi faitau, o lavalava ma seevae mo tamaiti, atoa ai ma computers ma printers e faaogaina e le Kolisi i ana galuega faatino. Sa saunoa le Susuga i le Alii Pule, Rev Dr Vaitusi Nofoaiga, e fai ma sui o le Kolisi, i le agaga faafetai ona o le agalelei o lea faalapotopotoga, ae maise ai o le faiga-paaga faaauau pea a le Kolisi ma le Lions Club i Sunshine, e tauala mai i le Susuga i le Faafeagaiga ia Sila. O le tatalo a le Alii Pule ma le Kolisi, ia saga faatamaoigaina pea e le Atua le Lions Club i Sunshine Victoria, auā le faatinoina o lea auunaga tāua mo le sosaiete ma le lalolagi.



Laptops ma Computers

VAAIGA ESE'ESE



MAFUTAGA A LE KOLISI

RIPOTI MAFUTAGA A'OA'O MA FALETUA

I le ava ma le fa'aaloalo tele e tatau ai, e tu'uina atu ai se ripoti pu'upu'u a le mafutaga a A'oa'o ma Faletua o lenei tausaga, 2023. E 35 A'oa'o o le Tausaga Muamua; e 17 i latou ua fai aiga (Faletua) ma le toa 18 i latou nofo toatasi. O loo aofia ai A'oa'o sikolasipi e toalua mai le Ekalesia Soofaatasi Kiripati ma le toalima mai le Ekalesia Kerisiano Tuvalu ma le A'oa'o Tokelau e toatasi. E toatasi le A'oa'o ua faamalolo ona o le feagai ai ma ma'i o le tino. O le Tausaga Lua, e 26 A'oa'o ae 15 i latou ua fai o latou Faletua. E toalua A'oa'o ua faamalolo lē tumau. O le Tausaga Tolu e 24 A'oa'o ae 19 ua fai aiga. O le Tausaga Fa e 27 A'oa'o ma Faletua e 22.

E i ai lava fa'afitauli ma lu'itau o lenei tausaga e pei o fa'ama'i ma tapu a le malo na a'afia ai a'oa'oga ma polokalame fa'agasolo. Peita'i sa lē muta ai lava le fa'atuatua i le Atua, o Ia o le tautai i aso louloua o le folauga, ua sologa lelei ai mea uma i galuega fai ma polokalame fa'auau i Lona alofa tausisi ma Lona agalelei.

O se fiafiaga lava lea i le ola aotauina i totonu o le Kolisi Faafaifeau i Malua nei, e lē gata o le ola aotauina i mataupu eseese i Matagaluega o le Feagaiga Tuai, Feagaiga Fou, Tala Faasolopito o le Ekalesia, Mataupu Silisili ma le Faiva Alofilima o le Mataupu Silisili, a o le tamaoiga faasoa mai le Alii Pule ma le aiga Faiaoga i alafua e limataitaina ai le faatinoga o tapuaiga ma sauniga i le Atua. Ua fai lava lea ma faatupu malosi i tiute eseese i totonu o le Kolisi i ana feau ma polokalame fai e aofia ai maumaga, pa povi ma lo'ilo'i, a o le faamatagofieina o laufanua ma nofoaga o le Kolisi.

O le vaega a le au kamuta o loo nafa pea ma le faaleleia o meatotino a le Kolisi i potu aoga, maota o Faiaoga ma vaega o faleaoga ua moomia, o le toe faaleleia o le pa pa'epa'e, o le fa'aleleia o le Women Center ma le toe fa'aleleia o fale le taua lea ua mafai ona fa'aaogaina i le usugafono a le Ekalesia i lenei tausaga 2023. O le pa pa'epa'e fa'ata'amilo i le Falemafutaga ma le Fale tusi a le Kolisi ma isi, o le vaega a le pa povi, vaega a le Samoa land ma le maumaga a le nu'u o loo i ai i le taimi nei. Ua i ai foi le toganiu fou ua totoina i le mea sa i ai le papovi i le pa tasi, ua i ai foi le suiga fou ua i ai le papuaa ua sifi i le nofoaga fou i le papovi e faafesagai ma le panu o loo i ai nei .

A'o le taumafaiga a le Susuga i le Fa'atamā ma le aiga nofo to'atasi i le teuteuina o lo latou nofoaga i pa laau matagofie. O le vaega a le Canteen mo vaega manaomia ma faatauga a le Kolisi, ma tiute o ave pasi ma ta'avale mo le momoliina ma le pikiina o fanau a le kolisi ina ia malupuipua alo ma fanau a Susuga i Faiaoga ma A'oa'o.

O le itufale o Faletua, i le teuteuina o Malumalu tapua'i, o pa la'au ma le fa'amatagofieina o le a'ai, e fa'apea fo'i so'o se taliga malo a le Kolisi, e pei fo'i o le tapenaina o potu e tofafa ai le ofisa o le Fonotele ma le Ekalesia I le taimi o lana usugafono o lenei tausaga. O le vaega a le IT poo fesootaiga faa tekonolosi i Malua i le feagai ai ma le tele o tiute fa'atekonolosi i lenei tausaga , e le gata o polokalame a le Kolisi, ae fa'apea fo'i i fonotaga a le Ekalesia e pei ona mo'omia ai le fesoasoani a lenei vaega. O nisi o vaega e pei o le vaega a le palama ma le fai-letise mo le fa'aleleia o le vai ma le eletise i totonu lava o le Kolisi. E momoli ai le faafetai i le Susuga i le Alii Pule ma Faiaoga ma o latou Faletua ona o le latou ta'ita'iga i nei polokalame ma galuega uma.

O se ripoti puupuu lea mai i le mafutaga a A'oa'o ma Faletua o lenei tausaga 2023 .

Fa'afetai .

Peresitene – Fiaalii Mafuolo ma le Faletua ia Alovale Mafuolo .



Failautusi – Taumaloto Salevao ma le Faletua ia Josephine Salevao .

TAALOGA A A'OA'O MA FALETUA

Faatalofa atu le Komiti o Taaloga i le paia ma le mamalu o le au faitau. O se ripoti lenei mo taaloga a le Kolisi Faafaifeau i Malua. E lua lanu o loo vaevaeina i ai Susuga i A'oa'o. O le lanu uliuli (black) ma le lanu paepae (white). E tolu ni vaega oloo vaevae i ai au taaalo a Susuga i A'oa'o e aofia ai le A,B,C. O Aso Tofi uma o vaiaso taitasi e faia ai taaloga pe a mae'a aoga i le aoauli. O taaloga, e aofia ai le soka (soccer) ma le lakapi pa'i (rugby touch). E faasolosolo taaloga e amata i le C, B, ae faai'u i le A. A mae'a, ona tauluga lea i le taaloga soka e tuufaatasi uma ai le A, B, ma le C.

E i ai foi Aso Tofi e faia ai taaloga kirikiti a le Kolisi. E 4 lanu ua vaevaeina i ai. O le au a le lanu samasama (yellow), meamata (green), moana (blue), ma le lanu mumu (red). E faagasolo uma e lu'i le au o loo



MAFUTAGA A LE KOLISI

mau ai le talita (shield). I le taimi nei, o loo mau le talita i le au Lanu Meamata (green).

O taaloga volipolo (volleyball) a Faletua e vaevaeina i vaega e fa: lanu mumu (red), meamata (green), moana (blue) ma le piniki (pink). O 'au nei e fa o loo saili ai foi le siamupini i le tuuaofaiga o manumalo.

O le sini lava ma le faamoemoe o polokalame taalo a le Kolisi ina ia maua pea le soifua maloloina e ala i faamalositino, ma sei mapu ane i feau ma galuega faapea aoaoga o loo feagai ai. Manuia le Fonotele.



AOAOGA A LE FANAU

AOGA ASO SA



E ofo alofa ma faatalofa atu i le Suafa manumalo o Iesu Keriso. I le ava ma le faaaloalo tele ou te tuuina atu ai se ripoti mo le Aoga Aso Sa a Malua, mo lenei afa muamua o le tausaga 2023. O le Aoga Aso Sa, e i lalo o le taitaiga a le Tamā Pule ma le Faletua, lagolagosua i ai Faletua o Faiaoga faapea ma Aoa Faaiuso ma Faletua. O le aofaiga o fanau o loo auai i le Aoga Aso Sa, e 147 i Vasega e lima, mai le Vasega Amata e oo i le Vasega Matutua Faapitoa.

O le kuata muamua o lenei tausaga na a'oa'oina ai fanau i tala o le Tusi Pa'ia e fa'aaoga ai le faasinoga o Tusi mo Aoga Aso Sa a le Ekalesia. O le faamoemoe e faaauau lava se'ia uma lenei tausaga.

Ae momoli ai le agaga faafetai i le Susuga i le Tamā Pule ma le Faletua, i le taitaiga ma le faatautaiga o le galuega faaleaoga Aso Sa i lenei kuata muamua o le tausaga faapea le lagolago a Faletua o Faiaoga. E momoli le faafetai i A'oa' Faaiuso ma Faletua sa galulue i le amataga o lenei tausaga i le avefa ma faiaoga Aso Sa. Malo faafetai. Faafetai tele i lau Susuga i le Tama Pule i le faatuatuaga na tuuina mai e fai ai ma Failautusi o le aoga Aso Sa I lenei kuata.

Failautusi Aoga Aso Sa
Mateilili Tautalagia

LITERACY

E saga viia pea le alofa ma le agalelei o le Atua, ona ua faamaeaina foi feau ma galuega amata o lenei polokalame ile manuia mo lenei kuata, ae lei tuua mo le fonotele o lenei tausaga. O le faamoemoe lava ia o lenei polokalame faitau tusi a le fanau, o le fesoasoani lea ile faaleleia o le faitau tusi faaperetania a le fanau, mai le 5 tausaga seia oo ile 13 tausaga o le matua. O Aso Toonai o vaiaso taitasi e faatino ai lenei polokalame mo le fanau, mai le 10am-11am. Na amatatia le polokalame leni ile aso 25 Fepuari 2023, i lalo o le vaaiga a Faletua o faiaoga, o Lemau Palaamo, Malavai Moleli ma Sina Wulf. E tusa ma le iva sefulu ma le lima (95) le aofai o fanau a Malua sa faamauina ile amataga o le polokalame o lenei tausaga, ma sa vaeveaina leni toatele i kulupu taitasi ua maeá ona faatulagaina, faatasi ai ma le fesoasoani a Faletua o A'oa'o filifilia i Aso Toonai taitasi, ina ia mautinoa e o'le fesoasoani i fanau i vaega e moomia tele ai, mo le faaleleia ma le siitia o la latou faitautusi faaperetania, i vaiaso taitasi.



E i ai foi le faletusi mo le fanau (kids library), e fesoasoani atili ile fanau mo isi tusi e moomia e latou e faitau, ma o le maeá o le sauniga lotu ile taeao o le Aso Sa, e tatala ai le faletusi mo le fanau, o le faamoemoe e omai i ai le fanau e piki a latou tusi faitau ma faamauina ile api o i ai, ae toe faafoi mai i le isi Aso Sa o lumanai. E maitauina lava le sagisagi fiafia o le fanau e faaogaina leni foi alagaó taua mo latou, ina ia faaleleia atili ai la latou faitau tusi faaperetania.

E matou te faafetaia pea le agalelei o le Atua ona o auala eseese sa maua mai ai tusi fou mo le fanau i tausaga ua tuana'i, ua mafai ai ona faaauauina pea leni polokalame fesoasoani mo le fanau. Ae o loo talia pea ma le agaga faafetai nisi fesoasoani ma la outou foai i soo se ala, ina ia mafai ai pea ona faatotogaina leni polokalame e ala i nisi tusi fou, ma sponsorship auā leni polokalame tāua mo fanau a le Kolisi. E faamoemoe lava ma tatalo i le Atua ia fesoasoani mai ina ia faaauau leni polokalame i le lumanai mo latou uma o loo fai mai i le Kolisi.

E faafetaia ai pea le Alii Pule o le Kolisi i Malua ma le Faletua, o Faiaoga ma Faletua, faapea mātua o fanau uma o leni polokalame, auā le lagolagoina ma le tapuaia o galuega faaauau o le polokalame mo leni tausaga. E faafetaia foi Faletua o A'oa'o o loo fesoasoani tele i le fa'amaopoopoina o leni faamoemoe. Ia manuia tele le Fono Tele mo leni tausaga.

Faafetai.
Sina Wulf

AOGA AMATA

O le amataga o leni tausaga sa amata ai le aoga amata a le Kolisi. O le aoga amata o loo i le taitaiga a le Tama pule Rev Dr Vaitusi Nofoaiga, ma le Faletua ia Mile Nofoaiga, faatasi ai ma le lagolagosua a Faletua o A'oa'o a le kulupu a le Aoga amata.

O le aofai o tamaiti o loo aoga ai e 19, e to'a 11 teine ae to'a 8 tama; o alo lava ma fanau a Faifeau Faiaoga ma a'oa'o o le Kolisi, faatasi ai ma alo o Faifeau Faiaoga o le Kolisi o Leulumoega. O lo'o mulimulita'i lava faasologa o mataupu i le ta'iala a le ofisa o aoga, o le faatinoina o lesona a faiaoga i po Aso Sa ta'itasi, i le tapenaina o mataupu a le fanau i vaiaso ta'itasi.

Na amata a latou mataupu i le;

Tagata.
Soifua maloloina.
Alafapeti.
A'ua'unaga mana'omia.
Numera.
Siepi.



O le Aso Gafua i le Aso Tofi e faia ai a latou mataupu, a'o le Aso Faraile, o le latou aso taalo. Na faatinoina foi le latou polokalame o le Eseta. Ma tufatufaina ai a latou Easter Egg. Sa vaaia lava le fiafia i lea aso. Sa faagasolo lava a'oa'oga mo aso ta'itasi, faatasi ai foi ma galuega faatino mo le aso. Sa galulue faatasi lava vaega e lua sa vaevaeina i ai faletua o le kulupu. O vaega uma nei o loo ta'ita'i ai le Faletua o le Tama Pule.

Na asia foi e le National Counsel of Early Child of Education mo a latou asiasiga masani o le tausaga, faapea foi le Ofisa o Aoga.

E momoli ai le faafetai i le Atua, ona ua faataunuina ma le manuia aoga a alo ma fanau mo leni kuata.

Faafetai lava,
Manutagi B.Laifaga.

RIPOTI FAITAU TUSI FAASAMOA - AOGA FAIFEAU

E muamua ona si'i le viiga ma le faafetai i le Atua ona o lona alofa ma lona agalelei, ua mafai ai ona faataunuina leni polokalame i leni kuata. O le faamoemoe o leni polokalame o le a'oa'oina lelei o alo ma fanau ina ia malamalama i a'oa'oga o le Tusi Paia. O le taimi muamua foi leni ua faia ai se Aoga Faifeau i vaega eseese e i ai le Faitau Tusi, Tusi Lima, Tusi Lolomi, Tala Tusi Paia, Mataupu Silisili, Tauloto, Numera (Faatele, Toese, Faaopopo, Vaevae), Gagana Samoa (Upu Faaloalo, Upu Faafeagai), Tautinoga FaaAposetolo ma le Tala Faasolopito o le Ekalesia.

O le aofai o tamaiti i leni a'oa'oga e 102, ma e faatinoina i Aso Faraile taitasi i le itula e 7 i le afiafi. Ua maea le suega muamua (Vaega muamua) na faia i le Aso Faraile 28/4/2023, sa mafai ona su'eina ai le Vasega Amata se ia oo i le Vasega 6, i le Mataupu Silisili ma le Tauloto.

O leni polokalame o loo ta'ita'ia e le Susuga i le Tama Pule ma le Faletua, faapea le lagolagosua i Faletua o Faiaoga, faapea Faletua o Faaiuso. Ua vaaia lava suiga lelei i fanau ua fiafia e auai ma a'oa'o i vaega uma ina ia faaleleia atili le Faitau Tusi Faasamoa ae maise lava i a'oa'oga o le Tusi Paia.

E saga faafetaia ai pea le alofa ma le agalelei o le Atua ona o lana taitaiga ua mafai ai ona fa'ataunuina ma le manuia le faamoemoe o le fanau i leni kuata. E momoli ai le agaga o le faafetai tele i le Susuga i le Tama Pule ma le Faletua ma Faletua o Faiaoga, mo le taitaiga ma le faatautaiina o leni polokalame taua ma le matagofie aua se lumanai manuia o alo ma fanau i Malua.

Alovale Fiaalii Mafuolo

FA'AMULI OLE ESETA—TAUSAGA MUAMUA

O se faamanuiaga tele mo i matou ina ua faamanuiaina le taumafai i le suega ulufale i le Kolisi Faafaifeau i Malua 2023. E to'atolusefulu ma le lima (35) le aofa'iga o A'oa'o ma Faletua o le matou vasega. E to'asefulumalevalu (18) A'oa'o faiafa, ae to'asefulufitu (17) A'oa'o nofo to'atasi. O loo aofia ai ma sui mai nisi o Ekalesia Kerisiano mai isi motu o le Pasefika e pei o Tuvalu (5), Kiripati (2) ma le A'oa'o e to'atasi mai le motu o Tokelau.

O le vaiaso o le tuuaga o le Eseta na faatino ai le faamuli a le Tausaga Muamua. O se avanoa taua lea mo i matou e faamasani ai i lea foi vaega taua o le ola a'otauina i totonu o le Kolisi Faafaifeau. Sa mafai ona maua avanoa matou te fesoasoani ai i faigalotu o le Aso Maliu ma le Aso Sa o le Toetu, ma lotu o le afiafi a le faamuli. O feau ma galuega o lea vaiaso taua e aofia ai le gaseseina o taumafa, o le tausiga o mea-fafaga ma manu papalagi i tuafale, faamamaina o le aai aemaise foi o le leoleoina o le aai atoa, a o i ai le Kolisi i malologa o le Eseta.

E tele luitau sa lagonaina ai e le faigofie le tau amataina o le taumafai. Peita'i e tele ni aoga taua ua maua auā le tapenaina o i matou i aoga i le Kolisi, aemaise foi o le tapenaina o matou tagata faatauvaa mo le galuega Faafaifeau i le lumanai.

E momoli ai la matou faafetai i le Susuga i le Taitaifaamuli, Rev Dr Vaitusi Nofoaiga faapea foi le Susuga i le Peresetene ma le Failautusi o le Mafutaga a A'oa'o ma Faletua mo le ta'ita'iga o le faamuli. Faafetai i o matou aiga, aulotu ma Faafeagaiga ona o le lagolago mai e ala i tatalo ma soo se ala na mafai ona fesoasoani mai ai.

Faafetai tele
Toeupu Kaisara – Taitaifono
Manutulila Lasi Soalo - Failautusi
Molesi Sagapolutele - Teutupe



MAFUTAGA A LE KOLISI

SUI USUFONO A LE KOLISI MO LE FONOTELE 2023



O le Susuga i le Faifeau Fomai Faiaoga ia Malutafa Faalili na fai ma Sui Usufono tofia o le Kolisi Faafaifeau i Malua mo lenei tausaga 2023. E pei lava foi ona masani ai i tausaga taitasi o le sui usufono lava a le Kolisi Faafaifeau e tapenaina le pepa e amataina ai le Fonotele. O faamanuiaga ma alofaaga mai le Susuga i le Alii Pule ia Vaitusi Nofoaiga ma le Faletua ia Mile faapea le aiga Faiaoga ma Faletua ma le Kolisi i le feagai ai ma le usugafono o lenei tausaga.



RIPOTI FALEOLOA A LE KOLISI

O le viiga ma le faafetai i le Atua Pule Aoao i lona agalelei i le folauga manuia a lana Ekalesia amata mai ona ao seia paia ona i'u. A o se ripoti lenei mai le vaega o le faleoloa (*Canteen*) a le Kolisi.

E tatala le faleoloa i aso uma o le vaiaso i le taeao, taimi o le malologa mai vasega, faapea le afiafi. O lenei faleoloa e maua ai le tele o oloa eseesee mo le Kolisi. O le faamoemoega ina ia i ai se tautua e tali ai le Kolisi i soo se mea e manaomia ai. Mo soo se porofiti e ono maua i le faaiuga o kuata taitasi poo le faaiuga o le tausaga, o nei faamanuiaga e faaoga e faaleleia atili ai le Kolisi i auala eseesee. O oloa o loo faatau atu i tau taugofie pe tutusa ma le tele o faleoloa o loo i fafo atu o le Kolisi. O faatauga faaaitalafu o loo avanoa foi ae e uma ona toe totogi. O lenei vaega o loo taitaiina lava e le Susuga i le Faiaoga ia Esera Esera, faatasi ai ma le lagolagosua a A'oa'o.

O le agaga o le faafetai e fia momoli i le Alii Pule ma le aiga Faiaoga aua le lagolagosua i le faleoloa a le Kolisi. E momoli foi le agaga faafetai i le paia o le Ekalesia, i la outou faatauaina o lenei auunaga ao usua ai le Fonotele i lenei tausaga. Tuuina atu lenei ripoti i le ava ma le migao tele e tatau ai. Ia manuia tele le Ekalesia a o feagai ai ma toe aso o le Fonotele. Vaega a le Canteen 2023.



MOTU LE PA UA ILOA

A'OAO'O MAI ISI EKALESIA O LE PASEFIKA

O loo faaauauina pea ona aotauina A'oa'o ma Faifeau mai isi Ekalesia i le Kolisi, e pei ona masani ai. I le Tausaga muamua, o loo i ai le A'oa'o ma lona Faletua mai le Ekalesia Faapotopotoga Kelisiano Tokelau, o Galu Faamaoni ma le Faletua ia Urima; o A'oa'o e toalima mai le Ekalesia Kelisiano Tuvalu, o Kulue Telala, Makaili Matatia, Malau Alasa, Richard Taui, ma Tepaula Vaega; faapea foi ma Faifeau e toalua mai le Kiribati Uniting Church, o Iuti Teruka, ma Teturunga Toaba. I le Tausaga lua, e toalua A'oa'o ma Faletua mai Tokelau; o Ioane Sosene ma le Faletua ia Tuvale, faapea ma Tui Paulo ma le Faletua ia Mavaega. I le Tausaga tolu, o loo i ai le A'oa'o ia Elisara Isaako mai Tokelau. O le vasega Faaiuso, o loo i ai le A'oa'o mai Tokelau o Peoni Lapana ma le Faletua ia Sela. O le vasega o le Masters of Theology o loo aotauina ai le A'oa'o mai le Ekalesia Faapotopotoga Kerisiano Amerika Samoa ia Ronald Tuimaug

ASO SA O TINĀ

Sa mati'e foi ma maualuga le aso o Tinā i Malua nei, ina ua mafuta mai nisi o Tinā o le Kolisi ma Faletua o Faafeagaiga i le tapuaiga o le Aso Sa o Tinā o lenei tausaga. Sa faafetaia ai ma faamanuia le Tamā Pule o le Kolisi poo le Faifeau foi o le aulotu a Malua, Rev. Dr Vaitusi Nofoaiga, i le afea ai o Malua e nisi o Tamā ma Tinā o le Kolisi faapea Susuga i Faafeagaiga ma latou Faletua sa malaga mai mo le Fonotele, ae faapea foi i tinā uma o le Kolisi, i le Faletua ia Mile Nofoaiga faapea Faletua uma o Faiaoga ma A'oa'o sa auai i lea aso. Sa tapenaina e le faamuli nai meaalofa mo le aso o Tinā.



VAVAO O LE FLU

O le saogalemu o le soifua o tagata uma le naunautaiga sa i le Susuga I le Alii Pule ma Faiaoga. O le aso 10 o Aperila na faailoa faalauaitete mai ai e le Ofisa o le Soifua Maloloina e ala i Televisi ma Leitio faapea fesootaiga faaonapo nei le aafia ai o nisi o le atunuu i le faama'i pepesi o le flu. O lea na a'e ai se tofa i le Susuga i le Alii Pule ma Faiaoga ina ia malolo aoga mo le vaiaso atoa (11-16 Aperila). O se finagalo lava ina ia mautinoa le malu puipuia o tagata uma aemaise o nai fanau. Ae sa faaauau pea polokalame masani a le Kolisi e ala i Lotu Taeao (Morning Devotion) ma aoga sa faaogaina ai upega tafailagi (Moodle/Zoom). O se fiafiaga tele ona ua toe tutupu mai nei faamai a ua maea tapena i ai i fesootaiga faaonapo nei ona o le Koviti-19 e pei ona aafia ai le lalolagi atoa. E sili lava le puipuia nai lo le tau toe togafitia.



PA PUA'A



O le faaiuga o le kuata muamua o le 2023 na suia ai le nofoaga o lo'ilo'i a le Kolisi, ma ua avea ai nei le fanua sa fai ma pa tasi i le itu i Saleimoa ma nofoaga fou. O le faamoemoe o lenei suiga ina ia faaavanoaina le nofoaga tuai sa i ai lo'ilo'i mai le 20 tausaga talu ai, mo ni fale o pulega ua moomia. E tusa ma le fa vaiaso na tapena ai le nofoaga fou o lo'ilo'i a le Kolisi. O le galuega tele sa feagai ma A'oa'o e aofia ai le tutu'i ma



faatutu o pou ma toso le uaea e si'o ma puipuia ai pa taitasi ina ia malu ma saogalemu mea fafaga a le Kolisi. Ua vaevaeina foi lo'ilo'i ina ia ta'ifitu e faafesagai ae faaavanoa le auala i le ogatotonu mo le faafaigofieina ona fafaga ma faafeinu manu o le lafu. E lagona ai pea le agaga faafetai ona e moni ai nisi o fatuga a le Kolisi, "o aoga lava mea uma". Manuia le fonotele.

AUALA



O le amataga o le masina o Me 2023, na amata ai le galuega o le toe faaleleia o le auala i totonu o le laumua i Malua nei. E momoli le faafetai i le Ekalesia Aoa ona o le galuega ua amata ma ua molimauina le matagofie o le galuega. E pei ona faailoa mai e le Ofisa o le Ekalesia, o loo i ai le faamoemoe e faauma le faia o le auala pe a maea le Fonotele o lenei tausaga.

TUSI MO SUEGA ULUFALE 2023
 FEAGAIGA TUAI **Esekielu**
 FEAGAIGA FOU **Evagelia Ioane**

ATINA'E A LE KOLISI

PAPOVI



MAUMAGA



Ta'ita'i – Rev. Dr Vaitusi Nofoaiga (Pule o le Kolisi)

A'oa'o – (T4) Laupama Lefaoseu, Esera Tufuga; (T3) Vagatai, Sebastian, Aokuso; (T2) Patamo, Mareko, John.

Ua i ai se suiga i lenei tausaga i tulaga o faato'aga maumaga a le Kolisi. Ua lē toe faatulagaina i Faiaoga ma auaiga, a ua vaai lautele e le Kolisi i lalo o le taitaiga a le Alii Pule ma le komiti faapitoa. Ua lelei foi lea fesuaiga i le tulaga o le galulue faatasi o le Kolisi atoa e atia'e ma faamamā ina ia lava ma totoe lea atinae mo le Kolisi ma ana fuafuaga. I le taimi nei, ua tele ituaiga ti'apula eseese o loo totoina ma ola ai i totonu o lenei atinae. O le aofa'i o



mea totō poo talo ua ola e 15,000 faatasi ai ma ma'umaga fou auā mea fai a le Kolisi faapea foi le Ekalesia. O loo malu puipuia foi le pa o loo si'omia ai lea atinae mai manu faalafuā ma isi. O loo manuia mea uma, leai se mea o faaletonu, ma le agaga faaaloalo, faafetai.

KAPISI



O se tasi lenei o atinae tāua a le Kolisi o lo o tua i ai i lenei vaitau o le taugata o le soifuaga e oo lava foi i fualaau faisua mo le gaseseina o taumafa. O lenei atinae o le toga kapisi o lo o faia lava i lona nofoaga masani i le vaega sa avea ma pa povi i aso ua mavae ma o lo o i ai faatasi ma le toganu i le taimi nei. O se tasi o atinae ua fesoasoani tele i taumafa aemaise lava i taimi e malotia ai le Kolisi ma taimi o faamuli, e faaoga ai kapisi mo gasesega. Ua mafai ai ona faaititia le seleni faaalu mo le faatauina o fualaau taumafa mata

aia gasesega. Ae le gata i lea o lenei atina'e o lo o faia lava i se tulaga saogalemu ma le soifua maloloina, e lē o faaogaina ai ni vailaau ma nisi o minerale ae o loo tausi lava i aso uma e A'oa'o ma fui lelei ina ia ola lausiusi ma lelei i le taumafa.

TAUTAI A'E

TOEAINA MA FAIFEAU PENISIONE



Alosina & Otaota Vavae FT
(Matagaluega Manukau Sasae)

O le viiga i le Atua, ona o le soifua auaua o nisi o Faifeau ma Tamā o le Ekalesia, ua a'e manuia le faatamasoaliiga i le galuega faifeau, ma avea ai ma Toeaina ma Faifeau penisione. O le Aso Lulu 24 o Me o le a faia ai se sauniga faapitoa e aloaia ai Penisione Malolo o nisi o Tamā ma Tinā o le Ekalesia, ma e taitaia e le Afioga i le Taitaifono o le Fonotele lea sauniga, le Susuga i le Toeaina Faatonu ia Tunumoso Iosia. O suafa nei o Toeaina, Faifeau ma Tinā o le a aloaia i lenei sauniga:



Roma & Wilma Enosa FT
(Matagaluega Apia i Sasae)



Meki & Maria Lauvi FS
(Matagaluega Laumua o Aotearoa)

O lea ua a'e manuia i fanua la outou faatamasoalii i le tai, ua matalupe foi le seuga i le faiva na asa i le galuega faafaifeau. Tautai a'e! Ua faamalo le fai o le faiva! Ia manuia tele le feagai ma malologa, i le alofa o le Tapau Sili i le Lagi.



Dr. Eletise & Rosa Suluvale FS
(Matagaluega Faleata)



Nuuasala & Mutaaga Cowley FS (Matagaluega Niusaulese i Sisifo)



Auva & Anofale Eneliko FS (Matagaluega Aukilani)



Larry & Semurana T. Williams FS
(Matagaluega Faleata)



Ioane & Silaumua Aloalii FS
(Matagaluega Kuiniselani)



Iakopo & Pele Manutai FS
(Matagaluega Manukau)



Harima & Maturi Le Mamea FS
(Matagaluega Apia i Sasa'e)




Esekia & Asofia Penueta FS
(Matagaluega Faleata)

GOLF

O le Aso Faraile, 19 Me 2023, sa faataunuina ai le taaloga tapolo faavaomalo i le malae i Faleata. O lenei taamilosaga e faia i tausaga taitasi i le taimi o le Fonotele, i le va o au a Niusila, Ausetalia, ma le au a le Kolisi Faafaifeau i Malua (Kolisi). I lenei tausaga, na lu'iina ai e le au malosi mai Niusila le ipu o loo umia e le au a le Kolisi. I le mae'a ai o le lotu o le Au Leoleo i le taeao o lea aso, sa potopoto ai loa au e lua i Faleata. Na amata lava i le tatalo, sosoo ma le mālu taeao, ma faagasolo ai loa le taaloga. E 12 au taitoalua mai Niusila ma le Kolisi. O lenei taaloga sa fai i le "best ball", ma sa faagasolo foi le taaloga i le faiga faa "shotgun". Ona o le loulouā o le tau, sa lē mafai ai ona faamae'a pu e lima o le malae, ona faatino lea o faiga masani mo ai o le taaloga. I le mae'a ai o le taaloga, sa potopoto uma au i le falesamoa mo se taumafataga, ma tōlāulauina ai le iuga o le taaloga. I le aotelega o ai, ua toe faatumauiina pea le ipu i le au a le Kolisi i lenei tausaga. Sa maua e le Kolisi ai e 877, a o Niusila e 892. I faailoga faapitoa, o ai sīlia poo le "best gross" sa maua e le au a Amuia Seuala ma Kerisimasi Mua'ava. O le ta mamao poo le "longest drive", sa maua e Tauaaga Mataafa (hole 3), Samani Sila (hole 8), Brian Kolia (hole 11), ma Amuia Seuala (hole 15). O le ta latalata poo le "nearest to the pin", sa maua e Tauaaga Mataafa (hole 2 & hole 6), Meki Lauvi (hole 10), ma Mose Galuvao (hole 16). E momoli atu le faamalo i Kapeteni o au e lua faapea sui o au taitasi, mo le mafutaga matagofie ma le taaloga mataina o lea aso.
Manuia le Fonotele.



I'ULEO O LE MALUAPAPA



Komiti o le Maluapapa
 Vaitusi Nofoaiga, Visesio Saga, Alesana Palaamo, Brian Kolia, Fatilua Fatilua, Clarke Stowers, Leulu Setu, Esera Esera.
 Vaafuti Alauni, Misioka Tanielu, Makesi Namulauulu, Peresia Muagututia
 Malua Theological College
 www.malua.edu.ws © 2023